
INSTITUTIONES PHILOSOPHICÆ.

PHILOSOPHIA, juxta vim nominis, est *amor* seu
1. *studium sapientiæ*. Quoad objectum suum consi-
derata, definiri potest: "collectio cognitionum quæ solâ
"ratione, discursûs ope, comparari possunt;" seu, ut alii
volunt, "cognitio discursiva veritatum quæ solâ ratione
"comparantur."

2. Philosophia vulgò dividitur in Logicam, Metaphysi-
cam, Ethicam seu Moralem, et Physicam. Logica tractat
de operationibus mentis nostræ relativè ad veritatis inqui-
sitionem, Metaphysica de entibus supra naturam corpo-
ream positis, Ethica seu Moralis de regulis morum, et
Physica de corporibus (a).

Hæc divisio ità non est accurata, ut idem objectum
solummodò pertineat ad unam partem, et non simul ad
alteram. Sic, v. g. *cogitationes* pertinent ad Logicam
quatenùs sunt dirigibiles ad veritatem inveniendam aut
demonstrandam, et ad Metaphysicam quatenùs sunt merè
spirituales.

(a) La Physique sera l'objet d'un traité particulier qui sera rédigé en français.